



Pranuar / Doretuar Përmirësi/Prodato Received/Delivered	24.03	3	viti god. year.
Organ /Njësia Organ /Jednitsa Org /Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKRUSHICK	2987/2023		1/4



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.165/2023

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Malsore Gashi-Bajraktari-kryetare, Ardita Haxhnikaj Demi dhe Arben Mehmeti-anëtarë, me Flakron Gashi-Zyrtar i Lartë për Bashkëpunim Profesional në cilësinë e procesmbajtësit, duke vepruar sipas ankesës A.nr165/2023 të datës 25.01.2023, të parashtruar nga ankuesi _____ nga Prishtina, kundër organit të punësimit/Ministria e Kulturës, Rinisë dhe Sportit, në çështjen juridike “Kompensim material”, në mbështetje të nenit 6 paragrafin 1 nën paragrafin 1.1, nenit 16 paragrafi 3 dhe nenit 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 24.03.2023, mori këtë:

V E N D I M

Refuzohet si e pabazuar ankesa me numër A.nr.165/2023 e datës 25.01.2023 e parashtruar nga ankuesi

A r s y e t i m

Ankuesi _____ i punësuar në Ministrinë e Kulturës, Rinisë dhe Sportit, më datë 25.01.2023 ka parashtruar ankesë me numër protokollit 826/2023 në Këshillin e Pavarur Mbikëqyrës për Shërbimin Civil të Kosovës, me pretendimet ankimore për kompensimin e shtesës për zyrtar të teknologjisë Informativ sipas Vendimit me shifër Nr.02/39 të datës 08.10.2008 të Qeverisë së Republikës së Kosovës, në vlerën 200 Euro nga data 21.05.2019.

Këshilli i Pavarur Mbikëqyrës për Shërbimin Civil të Kosovës, bazuar në dispozitat e Rregullores Nr. Nr.02/2018 për Procedurën e Shqyrtimit dhe Vendosjes së Ankesave, me datë 03.02.2023 ankesën e ankuesit e ka proceduar për përgjigje në ankesë në Ministrinë e Kulturës, Rinisë dhe Sportit. Ndërsa Këshilli, me datë 01.03.2023 ka pranuar përgjigjen në ankesë së bashku me shkresat e bashkëngjitura të lëndës.

Kolegji për Shqyrtimin dhe Vendosjen e Ankesave ka administruar këto prova: Ankesën me numër të protokollit 826/2023 të datës 25.01.2023 të parashtruar nga ankuesi në Këshillin e Pavarur Mbikëqyrës për Shërbim Civil të Kosovës; Kërkesën e ankuesit të datës 08.07.2019; Kërkesën e ankuesit të datës 02.11.2022; Vendimin e Qeverisë së Republikës së Kosovës të datës 08.10.2008; Vendimin e Qeverisë së Republikës së Kosovës të datës 31.07.2008; Akt emërimit e ankuesit të datës 21.05.2019; Përshkrimin e detyrave të punës për pozitën 'Zyrtar për Administrimin e IT-së'; Vendimin Nr.01/39 të Qeverisë së Republikës së Kosovës i datës 08.10.2008 me aneksin I; Kërkesën për përgjigje në ankesë të datës 03.02.2023; përgjigjen më provat e lëndës të datës 01.03.2023; Akt emërimit e ankuesit të datës 19.05.2020;

Kolegji për Shqyrtimin dhe Vendosjen e Ankesave, ka shqyrtuar të gjitha shkresat e bashkangjitura në lëndë, të dërguara nga palët në procedurë, dhe ka konstatuar se ankesa e ankuesit, *është e pabazuar, sepse:*

Nga administrimi i provave materiale Kolegji ka gjetur se ankuesi në bazë të Akt Emërimit të datës 21.05.2019 dhe atij të datës 19.05.2020 është i punësuar në pozitën "Zyrtar për Administrimin e Teknologjisë Informative" në Ministrinë e Kulturës, Rinisë dhe Sportit. Tutje sipas shkresave të lëndës, fillimisht më datë 08.07.2019, kishte parashtruar kërkesë tek Sekretari i Përgjithshëm lidhur me kompensimin e shtesave në pagë për IT bazuar në Vendimin me shifër Nr.02/39 të datës 08.10.2008 të Qeverisë së Republikës së Kosovës, mirëpo ankuesit nuk iu ishte realizuar kërkesa e tij sikurse nga shkresat e lëndës konstatohet se i njëjti nuk ka ndërmarrë asnjë hap procedural ankimor sikurse përcaktohej me dispozitat e ligjit material. Po ashtu, ankuesi me datë 01.11.2022 e ka përsëritur kërkesën e tij tek Sekretari i Përgjithshëm lidhur me kompensimin e shtesave në pagë për IT bazuar në Vendimin me shifër Nr.02/39 të datës 08.10.2008 të Qeverisë së Republikës së Kosovës, ndërsa për shkak të heshtjes administrative me datë 25.01.2023 ka parashtruar ankesë në Këshill.

Ankuesi në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendon për kompensimin e shtesës mbi pagën bazë për zyrtar të Teknologjisë Informative sipas Vendimit me Nr. 02/39 të datës 08.10.2008 të Qeverisë së Republikës së Kosovës, në vlerën 200 Euro nga data 21.05.2019.

Lidhur me vendosjen e kësaj çështje juridike-administrative, si dhe duke marr parasysh se pretendimet ankimore të ankuesit që kanë për objekt çështjen e kompensimit të shtesës mbi pagën bazë për zyrtar të Teknologjisë Informative sipas Vendimit me Nr. 02/39 të datës 08.10.2008 të Qeverisë së Republikës së Kosovës, në vlerën 200 Euro nga data 19.05.2019, Kolegji i Këshillit, konstaton se Kuvendi i Republikës së Kosovës, me datë 22.12.2022 ka aprovuar Ligjin Nr.08/L-196 për Pagat në Sektorin Publikë, i cili me datë 05.01.2023 është publikuar në Gazetën Zyrtare të Republikës së Kosovës Nr.1/5 Janar 2023, dhe si rrjedhojë i njëjti ka hyrë në fuqi më datë 05.02.2023, dhe ku me nenin 45 paragrafi 2 ka përcaktuar se: "Me hyrje në fuqi të këtij ligji shfuqizohet gjithashtu çdo dispozitë e ligjit apo e aktit nënligjor tjetër që rregullon çështjen e pagës, kompensimeve, shtesave, shpërblimeve apo kategorie tjetër në fushën e pagave, e që nuk është autorizuar shprehimisht për t'u nxjerr nga dispozitat e këtij ligji" ndërlidhur me nenin 11 të Rregullores (MFPT) Nr. 02/2023 për Shtesën për Kushte të Tregut të Punës ku përcaktohet: "Me hyrjen në fuqi të kësaj Rregulloreje shfuqizohet çdo akt nën-ligjor dhe dispozitë tjetër që bie në kundërshtim me këtë rregullore",

Kolegji i Këshillit ka ardhur në konstatimin se Vendimit me Nr. 02/39 të datës 08.10.2008 të Qeverisë së Republikës së Kosovës mbi bazën e të cilit ankuesi kërkon që t'i aprovohet shtesa në pagë tani më është shfuqizuar dhe mbi këtë bazë ligjore pretendimi ankimor i ankuesit është i pabazuar.

Sa i përket çështjes së kompensimit material, shtesës në mënyrë retroaktive në vlerën e 200€uro për muaj dhe atë nga periudha 21.05.2019 kur ankuesi kishte themeluar marrëdhënien e punës në pozitën "Zyrtar për Administrimin e Teknologjisë Informative", Kolegji i këshillit ka gjetur se ankuesi me datë 08.07.2019 kishte parashtruar kërkesë tek Sekretari i Përgjithshëm lidhur me kompensimin e shtesave në pagë për IT bazuar në Vendimin me shifër Nr.02/39 të datës 08.10.2008 të Qeverisë së Republikës së Kosovës, mirëpo ankuesit nuk iu ishte realizuar kërkesa e tij sikurse nga shkresat e lëndës konstatohet se i njëjti nuk ka ndërmarrë asnjë hap procedural ankimor sikurse përcaktohej me dispozitat e ligjit material, prandaj në kuptim të nenit 127 paragrafit 1 dhe 4 të Ligjit Nr.05/L-031 për Procedurën e Përgjithshme Administrative ku parashihet se: "1. Ankesa duhet të parashtrohet brenda tridhjetë (30) ditëve nga data kur pala është njoftuar për aktin administrativ. 4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ", Kolegji i Këshillit konstatoi se një pretendim i tillë ankimor për kompensimin retroaktiv është i jashtafatshme, gjegjësisht edhe për këtë çështje ankesa e ankuesit është e pabazuar.

Mirëpo, Kolegji i Këshillit, lidhur me shtesat mbi pagën bazë, konstaton se sipas Ligjit Nr.08/L-196 për Pagat në Sektorin Publikë, respektivisht nenit 22 është përcaktuar se: "1.Shtesat që mund përfitohen në bazë të këtij ligji janë: 1.1. shtesa e veçantë për të zgjedhurat/it; 1.2. shtesa për kushte tregu të punës; 1.3. shtesa e performancës; 1.4. shtesa për kushte specifike të punës; 1.5. shtesa për punën pa orar të paracaktuar; 1.6. shtesa për vëllimin e punës; 1.7. shtesa për licencë të avancuar për nëpunësen/in e arsimit para universitar; 1.8. shtesa për nëpunësen/in e sistemit shëndetësor; 1.9. shtesa e performancës për krijuesen/in dhe performuesen/in e artit dhe kulturës; 1.10. shtesa funksionale", ndërsa me nenin 24 të këtij ligji janë përcaktuar mënyrat e realizimit të shtesës për kushte të tregut të punës. Rrjedhimisht lidhur me këtë shtesë është miratuar Rregullorja (MFPT) Nr. 02/2023 për Shtesën për Kushte të Tregut të Punës e cila ka përcaktuar hapat procedural të realizimit të kësaj shtesë duke përcaktuar se kush mund të jetë përfitues i saj, ku në nenin 4 paragrafi 4 nën paragrafi 4.1, është përcaktuar se: "Profesionet për të cilat mund të përfitohet shtesa për kushte të tregut të punës janë: 4.1.profesionet deficitare në fushën e teknologjisë informative...", ndërsa neni 5 i Rregullores (MFPT) Nr. 02/2023 për Shtesën për Kushte të Tregut të Punës, ka përcaktuar dhe kriteret që duhet të plotësohen për të përfituar shtesën për kushte të tregut të punës për të punësuarit në fushën e teknologjisë informative.

Kolegji i Këshillit, duke ju referuar dispozitave të Rregullores (MFPT) Nr. 02/2023 për Shtesën për Kushte të Tregut të Punës, ka konstatuar se me nenin 10 janë përcaktuar procedurat për përfitimin e shtesës për kushte të tregut të punës, respektivisht sipas paragrafit 1 dhe 2 është përcaktuar se: "1. Për përfitimin e shtesës sipas kësaj Rregulloreje, Ministria përgjegjëse për Financa themelon Komision me mandat tre (3) vjeçar, 2. Njësia përgjegjëse për burime njerëzore e secilit institucion përgatitë listën e të punësuarve të cilët plotësojnë kriteret e kësaj Rregullore dhe e përcjellë atë tek Komisioni sipas paragrafit 1 të këtij neni, brenda dhjetë (10) ditëve pas hyrjes në fuqi të kësaj Rregulloreje", mbi këtë bazë Kolegji i Këshillit, konstaton se Njësia Përgjegjëse për Burime Njerëzore e Ministrisë së

Kulturës, Rinisë dhe sportit duhet që sipas detyrës zyrtare të ndër marr veprimet e nevojshme procedurale sipas dispozitave të lartcekura dhe të përcjellë listën e zyrtarëve që hyjnë në këtë fushë të shtesave tek komisioni përkatës i cili në kuptim të nenit 10 paragrafi 4, 5, 6 dhe 7 të kësaj rregulloreje ka kompetencë funksionale të bëjë shqyrtimin e kërkesave të tilla. Po ashtu, Kolegji i Këshillit përmes e-mailit të datës 21.02.2023 është njoftuar zyrtarisht nga Ministria e Financave, Punës dhe Transfereve, se Komisioni i përcaktuar në nenin 10 paragrafi 1 të Rregullores (MFPT) Nr. 02/2023 për Shtesën për Kushte të Tregut të Punës, është themeluar përmes vendimit të datës 06.02.2023 të Ministrit të Ministrisë së Financave, Punës dhe Transfereve.

Andaj, pas analizimit të shkresave të lëndës, analizimit të dispozitave ligjore si dhe konstatimeve të dhëna si në arsyetimin e këtij vendimi, Kolegji i Këshillit konstatoi se ankesa e ankuesit e datës 25.01.2023 lidhur me pretendimet e tij ankimore për kompensimin e shtesës për zyrtar të teknologjisë Informative sipas Vendimit me shifër Nr.02/39 të datës 08.10.2008 të Qeverisë së Republikës së Kosovës, në vlerën 200 Euro nga data 21.05.2019 është e pabazuar, ngase një akt i tillë është shfuqizuar me nenin 45 të Ligjit Nr.08/L-196 për Pagat në Sektorin Publikë, ndërsa për mënyrën e realizimit të kësaj shtese sipas dispozitave të reja ligjore, janë dhënë sqarimet e nevojshme si më lart.

Kolegji për shqyrtimin dhe vendosjen e ankesave, pas shqyrtimit të shkresave të lëndës si dhe duke u bazuar në nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbiqyrës për Shërbimin Civil të Kosovës, vendosi si në dispozitiv të këtij Vendimi.


Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike:


Kundër vendimit të Këshillit, pala e pakënaqur e mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIQYRËS PËR SHËRBIMIN CIVIL TË KOSOVËS **Lënda me numër A.nr.165/2023**

Flakron GASHI


Procesmbajtës

Malsore GASHI BAJRAKTARI


Kryetare e Kolegjit

Vendimi i dorëzohet:

- Ankuesit
- Sekretarit të Përgjithshëm në Ministrinë e Kulturës, Rinisë dhe Sportit;
- Udhëheqësit të Burimeve Njerëzore në Ministrinë e Kulturës, Rinisë dhe Sportit, dhe
- Arkiviot të KPMSHCK-së.